



Inatsisartunut ilaasortaq Ane Hansen, Inuit Ataqtigiit
- Maani /

15 FEB. 2016

NAMMINERSORLUTIK OQARTUSSAT
GRØNLANDS SELVSTYRE
INATSISARTUT ALLATTOQARFIAT
BUREAU FOR INATSISARTUT
BOX 1060 - 3900 NUUK

**Uumasut nappaateqalersillugit upalungaarsimasoqarnissaanut tunngatillugu §
37 naapertorlugu apeqqutip 2016-035-ip akineqarnera**

08-02-2016
Suliap nr.: 2016 - 2402
Akt. nr. 2104859

Inatsisartut suleriaasianni § 37, imm. 1 naapertorlugu Uumasut nappaateqalersil-
lugit upalungaarsimasoqarnissaanut tunngatillugu Naalakkersuisunut apeqqute-
qarsimavutit. Apeqqut uanga susassa qarfigisannit akineqartussanngorlugu inner-
suunneqarpoq.

Postboks 269
3900 Nuuk
Oqarasuaat (+299) 34 50 00
Fax: (+299) 34 63 55
E-mail: apnn@nanoq.gl
www.naalakkersuisut.gl

**1. Qimmit nappaalalernerani uumasut nakorsaata sillimannginnera Naalaker-
suisup qanoq iliuseqarfiginiarpa?**

Uumasunut Nakorsaqaqarnermut Inuussutissalerinermullu Oqartussaasut qimmit nappaa-
lanerannut sillimaniarnerat akiuussutissanik kapisisarnerit kaammattuutiginerisigut pina-
veersaartitsineruvoq. Tamanna qimmit nappaalanerannut sillimaniartoqarneratigut nu-
nani tamalaani ingerlataavoq. Tamatumunnga pissutaavoq qimmit nappaalanerat tunil-
latsinnikkut toqussutaasarmat, qaqtigullu katsorsarneqarsinnaasarluni. Uumasut peq-
qissutut isikkoqaraluarlutik tunillatsissimasut akiuussutissamik kapitinnikkut toqusin-
naapput, taamaammallu nappaalanerit aallartikkaangata unitsinnissaat ajornakusoor-
tarpoq.

Qimmit nappaalanerat malitseqartinniarlugu pinaveersaartitsineq sunnuteqarsinnaal-
luartoq pisariaqartinneqarpoq. Tamanna aatsaat pisinnaavoq pinngitsoorani akiuussu-
tissanik kapisisoqartarnissaanut pilersaaruteqarnikkut aammalu qimuttoqartarnerup na-
lilersoqqinneratigut. Tunillaassuunnerit unitsinneqanngippata, qimmillu tamarmik eqqor-
tumik akiuussutissanik kapitinngippata siunissami taamatut qimmit nappaalasarnerujus-
suat takujuassavarput.

Suliassaq naammaginatsumik naammassineqarsinnaassappat Kalaallit Nunaanni
Uumasunut Nakorsaqaqarnermut Inuussutissalerinermullu Oqartussaaffimmi sulisut amer-
lineqarnissaat pisariaqarpoq, suliffimmimi tassani sulisut ilaneqarnatik suliassat ukiuni
kingulliunerusuni amerliartortualersimammata.

Tassungalu ilanngullugu taaneqassaaq Namminersorlutik Oqartussani uumasut nakor-
saattut atorfiit inuttalersorniarlugit uumasut nakorsaannik pissarsiniartarnek ajornaku-
soortuaannarsimammata. Tamatumunnga suna pissutaanersoq oqaatigiuminaappoq.
Piginnaasaqarluarnissaq, suliassaqarfiit amerlavallaarnerat, taamatullu atorfiit nunani
avannarlerni allani akissarsiarissaarfiunerunerat pissutaasunut ilaasinnaapput.
Takussutissiaq 1 takuuk.

Assersuutigalugu Nuummi uumasunut nakorsaqaqarfiup pisortanit tapiiffigineqartartup, su-
lisunillu pisariaqartitsiffioqisup matuneratigut uumasunut nakorsatut atorfiit pilerinarneru-

lersinniarlugit Aalisarnermut, Piniarnermut Nunalerinermullu Naalackersuisoqarfik misiliisimagaluarpoq. Tamatuma saniatigut atorfinnut inuttassarsuisarnerit 2015-imi allangortinneqarsimagaluarput, taamaaliornikkut Uumasunut Nakorsaqaqarnermut Inuussutissalerinermullu Oqartussaaffimmut qinnuteqartartut allatut ilinniagaqarsinnaanerit, kisiannili inuussutissalerinermik tunngasunik ilinniagaqarsinnaanerit periarfissaqartillugu. Taamaakkaluartoq uumasunut nakorsat suli amerlanerusut pisariaqartinneqartuarput.

2. Naalackersuisoqarfik kommuninut nakkutilliinermini malittarisassaqaqarpa?

Ornigulluni nakkutilliisoqarneq ajorpoq. Naalackersuisulli perlerornermut akiuussutissanik kapuineq kisiat pillugu KANUKOKA-mik suleqatigiinnissamik isumaqatigiissusiorsimapput, kommunillu kvartalikkaartumik makkunatigut nalunaaruteqassallutik pisussaaffeqarput:

1. nunaqarfinni illoqarfinnilu qimmit qassiunerat,
2. qimmit akiuussutissanik kapitinnikkut qassiunerat,
3. perlerornermut akiuussutissat toqqortaait qassiunerat aamma
4. perlerornermut akiuussutissanik nutaanik inniminniisarneq.

Paasissutissiisarnerillu qimmit nappaalasarnerisa pinaveersaartinnissaannut atorluarneqarsinnaagaluarput, taamaalillutami qimmit perlerornerannut akiuussutissanik piareersimatitsinissatsinnut periarfissat pillugit kommuninik angusaqarfiussamik oqaloqateqarsinnaassagatta.

Paasissutissanilli tamakkuninnga kommuninut pissarsiniartarneq amerlanertigut ajornartarpoq.

3. Suliassat maangaannaq nakkaqqunagit naalackersuisoqarfiup aamma kommunip akisussaaffii malittarisassiuullugit ersarissarnikuuppat?

- a. Taamaattoqangippat malittarisassiuussinissaq pilersinniarneqarpa?**
- b. Pilersinniarneqangippat suna tunngavigineqarpa?**

3.a) Perlerornermut akiuussutissanik kapisarneq inatsisitigut pisussaaffiusoq pineqartillugu akisussaaffiit erseqqissumik agguanneqartussaapput. Tamanna suleqatigiinnissamik isumaqatigiissummi taaneqareersumi takuneqarsinnaavoq. Nappaat uumasu-neersoq katsorsaruminaatsoq matumani pineqarmat nuna tamakkerlugu perlerortoqarneranut akiuussutissanik kapisinissat inatsisitigut pisussaaffiupput. Tamannalu perlerornerup uumasunut inunnullu tunillaassuussinnaanerit paasineqassaaq.

Tunillatsereersimagaanni, tunillatsissimanermullu takussutissaqalersimappat nappaat katsorsarneqarsinnaangilaq toqussutaasinnaallunilu. Tamannalu pissutigalugu inuit illersornissaat pisariaqarpoq. Qimmilli nappaalanerat inunnullu tunillaassorsinnaangilaq, taamaalillutillu qimminik piginnittut akiuussutissanik kapisisoqarnissaanut akisussaasuu-lerput.

Akiuussutissanik kapisarnissanut allanut isumaqatigiissutaasunik peqartoqangilaq. Nammineq piomassuseq malillugu akiuussutissanik kapisarnerit qimmit nappaalanissaannut Parvovirusimullu illersuutaasussat perlerornermut akiuussutissat piniartarnerat assigalugu Uumasunut Nakorsaqaqarnermut Inuussutissalerinermullu Oqartussaasunut piniarneqarsinnaapput.

3.b) Qimmeqartut qimmit nappaalanerannut namminneerlutik akiuussutissanik inniminniisarnissartik akisussaaffigimmassuk Naalackersuisut tassuuna akisussaaffeqangillat. Qimmit nappaalanerannut, nappaatillu allat tunillaassorsinnaasut sunniuteqarluartumik

pinaveersaartinneqassappata pinngitsoorani akiuussutissanik kapisisoqartarnissaanut pilersaarut qimuttunillu aalajangersimasumik paarsisoqartarnissaa aqutigalugit aatsaat tamanna pisinnaavoq, taamaaliortoqarniarpallu massakkut inatsiseqartitsineq misissuif-figineqartariaqassaaq.

Inussiarnersumik inuulluarit

Karl-Kristian Kruse